



L'aua ed il sal han donnegiau la punt sur onns. Denter auter vegn il passapei stretg allontanus. La sanaziun cuozza entochen l'entschatta november.

FOTO S. MAISEN

Cumbat per la punt porta fretgs

Entschiet cullas lavurs da sanaziun vid la punt veglia a Danis-Tavanasa

DA SILVAN MAISEN / ANR

■ **L'entschatta mars han las lavurs da sanaziun dalla punt veglia a Danis-Tavanasa entschiet. La sanaziun cuozza entochen l'entschatta november. La finanziaziun ei per gronda part segirada.** Ils 30 da settember 2016 ha igl uffeci da construcziun bassa aviert la punt nova sur il Rein anteriur per il traffic motorisau. Il medem di ha il cantun surdau la punt veglia alla Fundaziun «Nossa Punt». Il cantun haveva l'intenziun da spazzar la punt, ils vischins da Danis-Tavanasa ein denton s'engaschai pil manteniment dalla punt construida igl onn 1928 tenor ils plans digl inschignier Walter Versell. In onn avon haveva ina bova destruiu l'emprema punt stada planisada dil renomaus inschignier da punts Maillard ed erigida igl onn 1905

Surdau las lavurs

Pressapauc miez onn suenten l'avertura dalla punt nova han las lavurs vid la punt

da muntada architectonica entschiet. La sanaziun cuozza entochen l'entschatta november. Las lavurs d'inschignier meina il biro Conzett Bronzini Partner AG da Cuera, l'interpresa Caprez-Bau AG da Glion exequeschas las lavurs da construcziun.

Denter auter vegn la cuvrida remplazzada. Tier la sanaziun vegn il passapei stretg allontanus. L'aua ed il sal han donnegiau la punt sur onns. Donnons vid il betun e ruina vid il fier ein il resultat. Tenor il president dalla fundaziun, *Sep Cathomas*, vegn la punt era equipada cun ina sempla illuminaziun dil passadi. Culla construcziun dalla punt nova diventa la punt da Versell ina punt aposta per ils pedunzs e velocipedists. Sco proprietari dalla punt survigilescha e finanziescha la Fundaziun Nossa Punt las lavurs da sanaziun.

Cuosts ein segirai

La sanaziun cuosta rodond 900 000 francs. Igl uffeci da construcziun bassa

separticipescha cun 300 000 francs vid quels cuosts. Plinavon ha la regenza concediu ina contribuziun da 318 000 francs sco contribuziun alla tgira da monuments. Era igl Uffeci federal per vias (Asttra) contribuescha ina part alla finanziaziun. Suenten la sanaziun procura la Fundaziun Nossa Punt pil manteniment dalla punt en accordanza cun la tgira da monuments dil Grischun. La vischnauna da Breil surpren la punt per diever general sco via communal per il traffic plaun (pedunzs, velos ect.) e dedichescha quella a quei intent.

Pli tard ha la vischnauna da Breil da tut temps la pussevialad ed il dretg da suprender la punt en sia proprietad, ha Sep Cathomas menziunau. Ulteriur dalla sanaziun dalla punt preveda la fundaziun ina documentaziun en fuorma da cudisch. La documentaziun raquenta la historia dalla punt Versell e dallas differents autras punts a Danis-Tavanasa. Ils daners per quei project vegnan aunc rimnai.

Tscherchau l'indipendenza

Gabriel Candinas cun atgna fatschenta da velos a Trun

■ **(anr/gv) La Bikeria senumna la fatschenta da velos da Gabriel Candinas aviarta questa primavera a Trun. Suenten in onn ella fatschenta Bike Surselva enamez il vitg ha igl um da 32 onns tscherchau l'indipendenza ed anflau al Plaz Cadruvi localitads per sia nova aventura.** Leu venda el velos dallas treis marcas Giant, Liv e Trek, pia ils velos dalla medema marca sco tochen dacheu. Bike Surselva vegn sligiau, il num resta denton en possess da *Marcus Michel* da Sport da muntogna.

Gabriel Candinas ha fatg ils davos onns in bien num sco mecanist da velos. Quellas habitads vul el tgirar vinavon. Igl onn vargau ha igl anteriur scrinari entschiet igl emprendissadi da mecanist

da velos. Expert astga el gia senumnar el servis dallas plemas.

Sonda e dumengia, ils 8 e 9 d'avrel envida Candinas all'exposiziun da primavera. Cun quella caschun muossa el la paletta cumpleta dallas treis marcas e porscha la caschun da far ina emprova cun in ni l'auter velo cun e senza motor electric.

Tier la fatschenta da velos ha Candinas ina secunda sfida professionala. Avon duas jamnas ei igl um da Surrein cun sedia a Sedrun e fatschenta a Trun vegnius eligius niev trenader da cuorsa liunga dil Surselva Skiteam. Leu remplazza el *Gion Antieni Maisen* da Trun ch'ei engaschau all'Academia Engiadina a Samedan.



Gabriel Candinas avon duas novas sfidas. Igl um da 32 onns ha aviert sia atgna fatschenta da velos ed ei il medem mument vegnius eligius trenader da cuorsa liunga dil Surselva Skiteam.

FOTO G. VENTURA

Ils affons dalla scoletta da Mustér exponan lur decoraziuns da Pastgas

■ **(cp) La Biblioteca populara Disentis/Mustér e contuorn ha ina decoraziun da Pastgas tut speciala: Cun bia premura han ils affons dalla scoletta da Mustér cun lur mussadra *Petra Pully* zambergiau gagglinas plein color ed exponiu quellas**

en nossa biblioteca. Ensemen cun l'exposiziun da cudischs da Pastgas fan las bellezia gagglinas ina stupenta para. La decoraziun sa vegnir admirada en la biblioteca a Mustér entochen ils 13 d'avrel. Ina viseta cunvegn en mintga cass.

